

MINISTERIO DE DEFENSA

12322 REAL DECRETO 1189/2000, do 23 de xuño, polo que se aproba o Regulamento da Real e Militar Orde de San Hermenexildo. («BOE» 156, do 30-6-2000.)

A Real e Militar Orde de San Hermenexildo foi instituída por un Real decreto do 28 de novembro de 1814. A través da súa dilatada historia produciuse un proceso de adaptación do seu regulamento á evolución social das Forzas Armadas, conservando o espírito que conforma a finalidade da Orde.

Polo Real decreto 223/1994, do 14 de febreiro, aprobouse o Regulamento da Real e Militar Orde de San Hermenexildo, que impuxo a adaptación necesaria e obxectiva á Lei 17/1989, do 19 de xullo, reguladora do réxime do persoal militar profesional.

A aplicación deste regulamento, vixente durante máis de cinco anos, proporcionou unha experiencia práctica que aconsella a súa modificación e perfeccionamento.

Non obstante, a promulgación da Lei orgánica 8/1998, do 2 de decembro, de réxime disciplinario das Forzas Armadas; da Lei 17/1999, do 17 de maio, de réxime do persoal das Forzas Armadas, e da Lei 42/1999, do 25 de novembro, de réxime do persoal do corpo da Garda Civil, leva consigo a necesidade dun novo Regulamento da Real e Militar Orde de San Hermenexildo acorde co que nelas se establece.

Na súa virtude, por proposta do ministro de Defensa, coa aprobación previa do ministro de Administracións Públicas, de acordo co Consello de Estado e logo de deliberación do Consello de Ministros na súa reunión do día 23 de xuño de 2000,

DISPONGO:

Artigo único. *Aprobación do regulamento.*

Apróbase o Regulamento da Real e Militar Orde de San Hermenexildo, o texto do cal se insire a seguir.

Disposición adicional única. *Mantemento das contías das pensións recoñecidas.*

As pensións recoñecidas ata o 1 de marzo de 1994 manterán a súa contía con carácter vitalicio.

Así mesmo, os oficiais e suboficiais que, antes do 1 de marzo de 1994, reunisen as condicións para alcanzar diferentes categorías da Cruz, establecidas no Real decreto 38/1986, do 10 de xaneiro, polo que se aproba o Regulamento da Cruz á Constancia no Servizo e que foi derogado polo Real decreto 223/1994, do 14 de febreiro, manterán na súa actual contía e con carácter vitalicio as pensións recoñecidas no ano 1989 para cada unha das categorías.

Disposición transitoria primeira. *Réxime dos procedementos xa iniciados.*

Os procedementos xa iniciados antes da entrada en vigor do presente real decreto, de solicitude de ingreso ou ascenso na orde, seralles de aplicación a normativa ata agora existente.

Disposición transitoria segunda. *Conservación de dereitos consolidados.*

Os membros da Real e Militar Orde de San Hermenexildo que pasasen a retiro con anterioridade á data do 1 de xaneiro de 1990 non poderán acollerse ós dereitos recoñecidos neste regulamento, pero seguirán conservando, como integrantes da Orde, os xa consolidados con anterioridade á data en que se produciu o dito pase.

Disposición transitoria terceira. *Condicións esixibles para os nomeamentos.*

As condicións esixibles para o nomeamento de Gran Chanceler, Censor e vocais da Asemblea serán de aplicación para aqueles nomeamentos que se efectúen a partir da entrada en vigor deste regulamento.

Disposición derogatoria única. *Derogación normativa.*

Quedan derogados:

a) O Real decreto 223/1994, do 14 de febreiro, polo que se aproba o Regulamento da Real e Militar Orde de San Hermenexildo.

b) A disposición adicional terceira do Real decreto 1323/1995, do 28 de xullo, polo que se aproba o Regulamento das Cruces do Mérito Militar, do Mérito Naval e do Mérito Aeronáutico e outras normas sobre recompensas militares.

Disposición derradeira primeira. *Facultade de desenvolvemento.*

Autorízase o ministro de Defensa para dictar cantas disposicións sexan necesarias no desenvolvemento deste real decreto.

Disposición derradeira segunda. *Entrada en vigor.*

O presente real decreto entrará en vigor o día 1 de xullo de 2000.

Dado en Madrid o 23 de xuño de 2000.

JUAN CARLOS R.

O ministro de Defensa,
FEDERICO TRILLO-FIGUEROA Y MARTÍNEZ-CONDE

REGULAMENTO DA REAL E MILITAR ORDE DE SAN HERMENEXILDO

CAPÍTULO I

Disposicións xerais

Artigo 1. *Finalidade.*

A Real e Militar Orde de San Hermenexildo ten por finalidade recompensar e distinguir os oficiais xenerais, oficiais e suboficiais do Exército de Terra, da Armada, do Exército do Aire, dos corpos comúns das Forzas Armadas e do corpo da Garda Civil, pola súa constancia no servizo e a irreprochable conducta, a teor do que establecen as reais ordenanzas para as Forzas Armadas.

Artigo 2. *Categorías.*

A Real e Militar Orde de San Hermenexildo está integrada por Cabaleiros e Damas, coas seguintes categorías:

- Gran Cruz.
- Placa.

- c) Encomenda.
- d) Cruz.

Artigo 3. *Concesión.*

1. A Gran Cruz concederáse mediante real decreto, acordado en Consello de Ministros.
2. A Placa, Encomenda e Cruz concederáse mediante orde do ministro de Defensa.

CAPÍTULO II

Organización. Dignitarios e órganos rectores e administrativos

Artigo 4. *Soberano da Orde.*

1. Súa Maxestade El-Rei é o Soberano da Real e Militar Orde de San Hermenexildo.
2. Presidirá o seu Capítulo e expedirá as reais cédulas das diferentés categorías da Orde.
3. A súa insignia é o Colar de Soberano, que ostentará nas solemnidades da orde.

Artigo 5. *Órganos rectores e administrativos.*

A Real e Militar Orde de San Hermenexildo réxese polos seguintes órganos:

- a) Capítulo.
- b) Asemblea Permanente.
- c) Chancelería.

Artigo 6. *Capítulo.*

1. O Capítulo, órgano superior de goberno da orde, presidido por Súa Maxestade El-Rei, como Soberano, e na súa ausencia polo Gran Chanceler, reunirase cada dous anos en sesión ordinaria e, con carácter extraordinario, sempre que o Soberano o dispoña.

2. O Capítulo intégrano, ademais dos membros da Asemblea Permanente, corenta e oito Cabaleiros ou Damas, dos que vinte pertencen ó Exército de Terra, dez á Armada, dez ó Exército do Aire, catro ós corpos comúns das Forzas Armadas e catro ó corpo da Garda Civil, correspondendo doce capitulares a cada unha das categorías de Gran Cruz, Placa, Encomenda e Cruz.

O Gran Chanceler solicitará oportunamente, do subsecretario de Defensa respecto dos corpos comúns, dos xefes dos Estados Maiores do Exército de Terra, da Armada e do Exército do Aire, así como do director xeral da Garda Civil, a designación dos capitulares correspondentes.

3. Poderán formar parte do Capítulo as autoridades militares que, pertencentes á Orde, sexan convidadas polo Soberano ou o Gran Chanceler.

Así mesmo, poderán asistir ás sesións de carácter extraordinario, como convidados, aquelas personalidades que coide conveniente o Soberano.

4. O Capítulo coñecerá dos asuntos que lle sexan sometidos por iniciativa do Soberano ou por proposta da Asemblea Permanente e adoptará os seus acordos por maioría simple, en votación secreta.

Os asuntos deberán ser sometidos ó Capítulo con tódolos antecedentes, datos e informes que os ilustren adecuadamente.

Nas votacións tomarán parte tódolos Cabaleiros e Damas capitulares cando se trate de asuntos relacionados coa categoría de Cruz; os de categoría de Encomenda, Placa e Gran Cruz cando se refiran a Encomenda; os de Placa e Gran Cruz para os relativos a Placa e unicamente os de Gran Cruz cando o asunto afecte a esta categoría.

5. Cando o Soberano non presida o capítulo, o Gran Chanceler daralle conta do resultado das votacións realizadas, con expresión do parecer da Asemblea Permanente e, se é o caso, do resto de Cabaleiros e Damas capitulares asistentes.

6. Tódolos compoñentes do Capítulo ostentarán a Medalla Pectoral correspondente, no desenvolvemento dos actos capitulares.

Artigo 7. *Asemblea Permanente.*

1. A Asemblea Permanente da Orde está constituída por:

O Gran Chanceler, o Censor, que actuará de secretario, e os seguintes vocais:

a) Os oficiais xenerais que, pertencendo á Orde, exercen o cargo de xefe do Estado Maior da Defensa, xefe do Estado Maior do Exército de Terra, xefe do Estado Maior da Armada, xefe do Estado Maior do Exército do Aire ou xefe do Cuarto Militar da Casa de Súa Maxestade El-Rei.

Permanecerán como membros da Asemblea Permanente durante un período de seis anos, a partir da data de cesamento nos referidos cargos, sempre que sigan pertencendo á Orde.

b) Seis oficiais xenerais en situación de reserva e en posesión da Gran Cruz, tres deles, polo menos, co emprego de tenente xeneral ou almirante, xeneral de División ou vicealmirante e un do corpo xurídico militar que exerce, ademais, a función de asesor do Capítulo e da Asemblea Permanente.

c) Un oficial xeneral en situación de reserva e en posesión da Gran Cruz, pertencente ó corpo da Garda Civil.

O nomeamento e cesamento dos vocais farase por orde ministerial, oído o Gran Chanceler respecto dos sinalados nos parágrafos b) e c).

O vocal de maior emprego e antigüidade substituirá o Gran Chanceler en caso de vacante, ausencia ou enfermidade.

2. Son funcións da Asemblea Permanente:

a) Emitir informe nos casos en que o requira o Soberano, o ministro de Defensa ou o Gran Chanceler.

b) Actuar como órgano asesor do ministro de Defensa e emitir informe, cando este o solicite, no proceso de elaboración de disposicións de carácter xeral que poidan incidir no establecemento ou modificación de recompensas militares ou das reais ordenanzas para as Forzas Armadas.

c) Aprecia-la conducta irreprochable, para efectos de ingreso ou ascenso na Orde.

d) Propo-las resolucións ós expedientes sobre ingreso, ascenso e baixa na Orde, unha vez oído o Censor.

e) Velar polo cumprimento deste regulamento.

3. As deliberacións da Asemblea Permanente serán de carácter reservado e tódolos seus compoñentes terán voz e voto, e deberán observa-la confidencialidade e reserva da información que conteña a documentación dos interesados.

4. A Asemblea Permanente conservará e custodiará o Estandarte, que estará presente nos actos solemnes da Orde e os seus compoñentes ostentarán neles a Medalla Pectoral.

5. A Asemblea Permanente actuará, tamén, como Asemblea da Real e Militar Orde de San Fernando, incorporándose a ela, en calidade de vocais, o presidente da Comisión Permanente da dita Orde e os Cabaleiros Laureados que determina o seu regulamento.

Así mesmo, conservará e custodiará o Estandarte da Real e Militar Orde de San Fernando.

Artigo 8. *Chancelería.*

1. A Chancelería, constituída pola Comisión Executiva e a Unidade Administrativa, levará a cabo a xestión e tramitación de tódolos asuntos da Orde, así como os da Real e Militar Orde de San Fernando.

2. A Comisión Executiva, presidida polo censor da Orde, componse de catro Cabaleiros ou Damas, coa categoría de Placa.

Depende orgánica e funcionalmente do Gran Chanceler.

3. Os compoñentes da Comisión Executiva serán designados por orde do ministro de Defensa, por proposta do Gran Chanceler.

4. Son funcións da Comisión Executiva a xestión de cantos asuntos, relacionados coas Reais e Militares Ordes de San Hermenexildo e San Fernando, lle sexan encomendados e a organización, coordinación e supervisión dos actos capitulares e celebracións solemnes de ámbalas ordes e asisti-lo Capítulo no desenvolvemento das súas funcións.

5. A Unidade Administrativa, baixo a dirección do Censor, preparará os asuntos que teñan que coñecer as Asembleas das dúas Reais e Militares Ordes.

Depende orgánica e funcionalmente do Gran Chanceler e administrativamente da Dirección Xeral de Persoal do Ministerio de Defensa, na que se encadra.

As vacantes desta Unidade Administrativa serán publicadas no «Boletín Oficial de Defensa» a pedimento do Gran Chanceler.

Os rexistros e arquivos das dúas Reais e Militares Ordes estarán a cargo da dita Unidade Administrativa.

Artigo 9. *Gran Chanceler.*

1. O Gran Chanceler da Real e Militar Orde de San Hermenexildo, representante da suprema dignidade do Soberano, será un xeneral de Exército, almirante xeneral ou xeneral do Aire, en situación de reserva, en posesión da Gran Cruz da Orde, nomeado mediante real decreto, acordado en Consello de Ministros, por proposta do ministro de Defensa.

2. Correspóndelle:

- a) Presidi-lo Capítulo en ausencia do Soberano.
- b) Presidi-la Asemblea Permanente.
- c) Consultar co Soberano da Orde os asuntos transcendentales, presentándolle as propostas e acordos adoptados polo Capítulo ou, se é o caso, a Asemblea Permanente.

d) Trasladarlle ó ministro de Defensa as propostas adoptadas sobre concesión ou denegación das distintas categorías da Orde ou de baixa nela, para a súa resolución e posterior publicación do real decreto ou orde correspondente.

e) Presidi-la Asemblea da Real e Militar Orde de San Fernando.

3. A súa insignia é o Colar de Gran Chanceler, que ostentará nas solemnidades da Orde.

Artigo 10. *Censor.*

1. O Censor da Real e Militar Orde de San Hermenexildo, principal informador da Asemblea Permanente con carácter preceptivo, será un xeneral de brigada ou contraalmirante, en situación de reserva, en posesión da Gran Cruz da Orde, nomeado polo ministro de Defensa, logo do informe do Gran Chanceler.

2. Correspóndelle:

a) Informa-la Asemblea Permanente sobre tódolos expedientes que se instrúan para ingreso, ascenso ou

baixa na Orde, así como os que se tramiten por incidencias relacionadas con ela.

- b) Exerce-lo cargo de secretario do Capítulo e da Asemblea Permanente.
- c) Presidi-la Comisión Executiva.
- d) Dirixi-la Unidade Administrativa.

CAPÍTULO III

Réxime da Orde

Artigo 11. *Condicións xerais.*

1. Para ingresar ou ascender na Real e Militar Orde de San Hermenexildo son requisitos indispensables:

a) Ser oficial xeneral ou oficial da escala superior de oficiais, da escala de oficiais, ou suboficial da escala de suboficiais do Exército de Terra, da Armada, do Exército do Aire e dos corpos comúns das Forzas Armadas, así como ser oficial xeneral ou oficial da escala superior de oficiais, da escala de oficiais, das escalas facultativas superior e técnica, ou suboficiais da escala de suboficiais do corpo da Garda Civil.

b) Ter cumpridos os tempos de servizo que se indican no artigo seguinte.

c) Ter observado unha conducta irreprochable a teor do que establecen as reais ordenanzas das Forzas Armadas.

d) Non ter, na data de solicitude, delictos ou faltas e as penas ou sancións correspondentes, sen cancelar na súa documentación persoal.

2. Non poderán solicita-lo ingreso ou ascenso na Real e Militar Orde de San Hermenexildo aqueles que cesasen na relación de servizos profesionais antes de cumpriren o tempo de servizo esixible para cada categoría.

3. A cancelación das notas desfavorables estampadas nas follas de servizos non asegura o dereito dos interesados ó ingreso ou ascenso na Orde, xa que, aínda anulada a súa inscrición, a Asemblea pode apreciar, á vista dos antecedentes que serviron de base ás anotacións, que, pola natureza dos feitos que as orixinaron, pola súa reiteración ou por outras circunstancias, non se corresponden cunha conducta irreprochable.

Para estes efectos, a Asemblea da Orde poderá solicitar, dos órganos de persoal onde radiquen as documentacións, conforme autoriza o disposto nos artigos 74.2 da Lei orgánica 8/1998, do 2 de decembro, de réxime disciplinario das Forzas Armadas; 98, parágrafo segundo, da Lei 17/1999, do 18 de maio, de réxime de persoal das Forzas Armadas; 62.2 da Lei orgánica 11/1991, do 17 de xuño, de réxime disciplinario da Garda Civil, e 46.2 da Lei 42/1999, do 25 de novembro, de réxime do persoal do corpo da Garda Civil, a certificación dos antecedentes que serviron de base ás notas invalidadas e das cualificacións periódicas, informes persoais e observacións dos mandos, se é o caso.

4. Non terá acceso á Orde quen non ostente efectivamente algún dos empregos das distintas categorías de oficiais xenerais, oficiais e suboficiais, aínda que teñan concedida asimilación, consideración ou emprego honorífico nelas.

Artigo 12. *Tempos para ingreso ou ascensos.*

1. Poderán ingresar na Real e Militar Orde de San Hermenexildo, como Cabaleiros ou Damas Cruz, os oficiais xenerais, oficiais e suboficiais que leven vinte anos de servizo.

2. A categoría de Cabaleiro ou Dama Comendador poderá obterse, por ascenso do Cabaleiro ou Dama Cruz,

cando se contén cinco anos de servizos nesta categoría.

3. A categoría de Cabaleiro ou Dama Placa poderá obterse, por ascenso do Cabaleiro ou Dama Comendador, cando se contén cinco anos de servizo nesta categoría.

4. A categoría de Cabaleiro ou Dama Gran Cruz poderá obterse, por ascenso do Cabaleiro ou Dama Placa, cando se contén, polo menos, tres anos de servizo nesta categoría e se posúa o emprego de oficial xeneral.

5. O cómputo dos prazos anteriormente sinalados para o ingreso e ascenso a cada categoría efectuarase aplicando os aboamentos e descontos que procedan, conforme a normativa aplicable.

Artigo 13. *Validación de tempos.*

1. Para o ingreso ou ascenso na Orde considerarase como tempo de servizo o transcorrido nas situacións administrativas que, de acordo coa normativa vixente, sexa computable como servizo efectivo, máis o tempo de aboamentos que corresponda. Así mesmo, computarase o tempo transcorrido na situación de reserva do militar profesional, pero non o de reserva do servizo militar anterior á consideración de militar profesional.

2. Consideraranse como tempos de aboamento os seguintes:

- a) Tempo de servizo como militar de continxente.
- b) Tempo de servizo como militar profesional de tropa ou mariñeiría ou como membro da escala de cabos e gardas do corpo da Garda Civil.
- c) Tempo de servizo como militar de complemento ou equivalente.
- d) Tempo que proceda por permanencia como alumno nos centros docentes militares de formación para militares de carreira.
- e) Tempo de servizo que proceda como participante en operacións militares para a defensa de España ou para o mantemento da paz e seguridade internacionais.

Este último tempo de servizo será computado co aumento que, para cada caso, determine o ministro de Defensa por proposta do xefe do Estado Maior da Defensa.

3. Os anos e meses para cómputo de tempos serán os naturais, expresándose en días os que excedan destes. Para a composición de meses, por suma de días, contarase un mes cada trinta días e un ano por cada doce meses.

Para determina-los días que se teñan que aboar, cando a situación que dea lugar ó feito se exprese entre dúas datas, contaránse ambas.

Artigo 14. *Ingreso do Herdeiro da Coroa.*

O Herdeiro da Coroa poderá ingresar na Real e Militar Orde de San Hermenexildo, coa categoría de Gran Cruz, por disposición do Soberano.

Artigo 15. *Solicitudes de ingresos e ascensos.*

1. En tódolos casos, o procedemento de ingreso ou ascenso na Orde, agás o disposto no artigo 14, iníciarase por solicitude do interesado dirixida ó Soberano, xunto coa declaración sobre os seus antecedentes penais e cursada ó Gran Chanceler por conducto regulamentario.

2. O persoal que mantivese na súa folla de servizos algunha nota desfavorable non poderá solicita-lo ingreso ou ascenso na Orde ata que fose cancelada.

3. Tampouco poderá solicita-lo ingreso ou ascenso quen se encontre sometido a procedemento penal, expediente disciplinario por falta grave ou expediente gubernativo.

Artigo 16. *Procedemento.*

1. As solicitudes serán tramitadas polos xefes de unidade, centro ou organismo, a través do órgano de persoal onde radique a documentación do interesado.

As ditas solicitudes serán acreditadas polo órgano de persoal, ou órganos depositarios das follas de servizos, coa seguinte documentación:

- a) Antecedentes penais e disciplinarios do solicitante.
- b) Folla-resumo da folla de servizos, debidamente certificada.

Cando se trate de ascensos na Orde, só se cubrirán os datos correspondentes ó período de tempo transcorrido entre a última concesión e a que se solicita.

c) Estado-proposta, emitido polo xefe de unidade, centro ou organismo correspondente, no que figurará o tempo de servizos efectivos, os aumentos por aboamentos e as deducións de tempos que non sexan computables para efectos da Orde.

d) Certificación do órgano de persoal correspondente, cando o solicitante teña dúas ou máis cualificacións anuais consecutivas con valoración inferior ou moi inferior á media no concepto de «disciplina» ou goce de «prestixio profesional» baixo, nulo ou negativo nos informes persoais de cualificación, sempre e cando o superior xerárquico do cualificador non mostrase o seu desacordo con este nalgún deles.

2. Unha vez cumpridos os prazos e condicións regulamentarias para o ingreso ou ascenso na Orde, os interesados poderán presenta-las súas solicitudes. Se o fan dentro do prazo de seis meses, asignaráselles como data de concesión a do cumprimento das condicións.

Se as solicitudes de ingreso ou ascenso se presentasen con posterioridade ó referido prazo de seis meses asignaráselles como data de concesión a de entrada da solicitude no rexistro do órgano competente para a súa tramitación, agás que a demora se xustifique como non imputable ó petionario.

O expresado no parágrafo anterior pode dar lugar a que os que non presentasen a súa solicitude dentro do dito prazo, mesmo tendo cumpridas tódalas condicións esixidas antes de pasaren a retiro, perdan os seus dereitos cando a antigüidade que debería asignárselles por ese atraso sexa unha data posterior á do seu pase a retirado, momento no que terán deixado de estar suxeitos ó réxime xeral de dereitos e obrigas do persoal das Forzas Armadas e ás leis penais e disciplinarias militares.

3. A vista da documentación achegada e oído o censor, a Asemblea Permanente formulará a proposta pertinente, que o Gran Chanceler lle trasladará ó ministro de Defensa para a súa resolución e publicación do real decreto ou orde correspondente.

O ministro poderá devolve-las propostas presentadas expresando o seu desacordo, para a súa reconsideración pola Asemblea Permanente.

As resolucións que se adopten serán motivadas e axustaranse ó disposto no artigo 89.3 da Lei 30/1992, do 26 de novembro, de réxime xurídico das administracións públicas e do procedemento administrativo común, debendo notificarse de acordo co establecido no artigo 58 e seguintes da mesma lei.

4. Os procedementos de ingreso ou ascenso na Orde resolveranse no prazo de seis meses, distribuídos da seguinte forma:

a) Dous meses, para que o órgano de persoal documente a solicitude e remita o expediente á Asemblea Permanente.

b) Tres meses, para que a Asemblea Permanente faga a súa proposta e o Gran Chanceler lla traslade ó ministro de Defensa.

c) Un mes, para que se publique a resolución, mediante real decreto ou orde, no «Boletín Oficial del Estado» ou no «Boletín Oficial del Ministerio de Defensa».

Se no prazo de seis meses establecido non se notificase a decisión, a solicitude considerárase desestimada, co que queda expedita a vía contencioso-administrativa.

5. O falecemento do interesado non impedirá a continuación do procedemento, ata a súa resolución.

Artigo 17. *Recursos.*

As resolucións do Consello de Ministros e do ministro de Defensa, no ámbito das súas respectivas competencias, porán fin á vía administrativa, e contra elas poderán interperse, con carácter potestativo, recurso de reposición previo á vía contencioso-administrativa.

Artigo 18. *Real cédula.*

Concedida a recompensa expedirase a real cédula que o acredite e realizárase a correspondente anotación na documentación persoal do interesado.

Os dereitos e obrigas da recompensa obtida enténdense concedidos pola publicación desta no «Boletín Oficial del Estado» ou no «Boletín Oficial del Ministerio de Defensa», se é o caso.

CAPÍTULO IV

Dereitos

Artigo 19. *Uso e emprego das condecoracións.*

1. Tódolos Cabaleiros e Damas pertencentes á Orde poderán ostentar sobre o uniforme as condecoracións desta que teñan concedidas e os correspondentes pasadores, de acordo coas normas regulamentarias de uniformidade.

2. Nos actos solemnes da Orde, os Cabaleiros e Damas que tomen parte neles ostentarán unicamente as condecoracións desta e a Cruz Laureada de San Fernando e a Medalla Militar, os que as posúan, e a insignia que, se é o caso, corresponda a cada un.

Artigo 20. *Imposición.*

Cando os interesados estean en situación de servizo activo ou ocupando destinos asignados á de reserva, as condecoracións serán impostas con solemnidade, con ocasión de que a unidade á que pertence o condecorado forme con armas, ou na forma e lugar que determine o xefe ou director, cando pertenza a centros ou organismos.

Nos demais casos, a entrega da real cédula equivalerá á imposición citada no parágrafo anterior.

Artigo 21. *Dereitos económicos.*

As diferentes categorías da Real e Militar Orde de San Hermenexildo, que se establecen neste regulamento, non levarán consigo a percepción de ningunha pensión.

CAPÍTULO V

Inhabilitación

Artigo 22. *Impedimentos.*

1. Non poderán ingresar, ascender nin permanecer na Orde:

a) Os condenados a pena principal ou accesoria de perda de emprego ou suspensión de emprego.

b) Os sancionados en virtude de expediente gubernativo, con separación do servizo, suspensión de emprego ou perda de postos na escala xerárquica.

c) Os que a xuízo motivado da Asemblea Permanente, mesmo tendo invalidadas as notas desfavorables na súa folla de servizos, atendidos os antecedentes que serviron ás notas invalidadas e as cualificacións persoais periódicas, se considere que pola natureza dos feitos que os orixinaron, pola súa repetición ou por outras circunstancias, non poden ser considerados observantes dunha irreprochable conducta, a teor do que indican as reais ordenanzas para as Forzas Armadas.

2. Non poderán ingresar nin ascender na Orde os condenados por calquera delito ou sancionados por falta grave ou leve, mentres non fosen canceladas as correspondentes notas desfavorables.

3. Así mesmo, non poderán ingresar ou causarán baixa na Orde, cando, a xuízo da Asemblea Permanente, se estime que non deben pertencer ou permanecer nela os que teñan dúas ou máis cualificacións anuais consecutivas con valoración «inferior» ou «moi inferior» á media, no concepto «disciplina», ou que gocen de «prestixio profesional» con nivel «baixo», «nulo» ou «negativo», nos informes persoais de cualificación.

4. Para os efectos considerados neste artigo, os órganos de persoal onde radique a documentación do persoal das Forzas Armadas e do corpo da Garda Civil comunicaranlle, á Asemblea, a teor do disposto no artigo 74.2 da Lei orgánica do réxime disciplinario das Forzas Armadas e 62.2 da Lei orgánica do réxime disciplinario da Garda Civil, en canto lles conste, as penas e sancións que sexan impostas e dean lugar a anotacións na folla de servizos, así como as cancelacións de notas desfavorables que se produzan.

Igualmente comunicarán, mediante certificación, as cualificacións anuais que se citan no número 4 anterior dos informes persoais de cualificación.

Artigo 23. *Resolución de baixa na Orde.*

1. A resolución de baixa na Real e Militar Orde de San Hermenexildo dalgún dos seus membros requirirá a instrución do correspondente expediente, que se tramitará de acordo coas normas do procedemento sancionador vixente nas administracións públicas.

2. O instructor do procedemento, que deberá ser de emprego superior ou máis antigo que o expedientado, será nomeado polo Gran Chanceler. Así mesmo, designarase un secretario que asistirá o instructor.

Para iso, o Gran Chanceler solicitará do subsecretario de Defensa para os corpos comúns ou do xefe de Estado Maior do Exército a que pertence o expedientado ou, se é o caso, do director xeral da Garda Civil, a proposta dos Cabaleiros ou Damas da Orde que considere adecuados para os cargos de instructor e secretario.

3. Á vista do resultado do expediente instruído, a Asemblea Permanente propondrá a baixa ou a permanencia na Orde do interesado.

En caso de que se propoña a baixa na Orde, o Gran Chanceler trasladaralle a proposta ó ministro de Defensa para a súa aprobación.

4. A resolución da baixa na Real e Militar Orde de San Hermenexildo dos Cabaleiros ou Damas Gran Cruz será adoptada por real decreto acordado en Consello de Ministros.

5. A resolución de baixa na Real e Militar Orde de San Hermenexildo dos Cabaleiros ou Damas pertencentes ás restantes categorías será adoptada mediante orde.

Artigo 24. *Efectos da exclusión.*

A baixa como membro da Real e Militar Orde de San Hermenexildo producirá a perda de tódalas prerrogativas inherentes á recompensa.

CAPÍTULO VI

Escudos, estandarte, condecoracións e insignias

Artigo 25. *Escudos.*

A Real e Militar Orde de San Hermenexildo, como «Orde Militar», ten a potestade de utilización de escudos representativos dos seus diversos estamentos.

1. Escudo da Orde.

Escudo de contorno circular. En campo de azur, efixie de San Hermenexildo montado en cabalo galopando á sinistra cunha palma na man destra, todo de ouro, terrado deste. Bordura de esmalte branco coa inscrición en ouro: REAL Y MILITAR ORDEN DE SAN HERMENEXILDO.

Este escudo levará como adornos exteriores dúas ramas de loureiro de sinople, frotadas de gules, unidas polos seus troncos e leadas en punta con lazo de gules timbrado de coroa real.

2. Escudo de soberano.

Súa Maxestade El-Rei, como Soberano da Real e Militar Orde de San Hermenexildo, utilizará as súas armas persoais rodeadas do Colar de Soberano da Orde.

3. Escudo de Gran Chanceler.

O Gran Chanceler utilizará o escudo da Orde con adornos exteriores rodeado polo Colar de Gran Chanceler.

Artigo 26. *O estandarte.*

1. O estandarte da Real e Militar Orde de San Hermenexildo, terá as seguintes características:

Estará formado por dúas teas de damasco de seda branca, para anverso e reverso, nun cadrado de 60 cm de lado. O pano levará unha orla de cor carmesí de dous centímetros de largo e desde o ángulo superior da vaiña ó ángulo inferior do pendente, banda da Gran Cruz nas súas cores de dez centímetros de largo. No centro do pano, Escudo da Orde con adornos exteriores. Flocadura de ouro de cinco centímetros.

A cimeira levará gravada a Cruz de San Hermenexildo con Coroa Real nas súas cores. A hasta será de bambú con intermedios e regatón gravados e esmaltados estilo Toledo.

A altura da hasta con cimeira será de dous metros corenta centímetros.

2. O Estandarte será conservado e custodiado pola Asemblea Permanente e estará presente nos actos solemnes da Orde.

3. O Estandarte será portado por un Cabaleiro ou Dama Gran Cruz e escoltado por tres Cabaleiros ou Damas Placa.

Artigo 27. *Condecoracións.*

As condecoracións que referendan as distintas categorías da Real e Militar Orde de San Hermenexildo terán as seguintes características:

1. A Cruz estará constituída polo Escudo da Orde, sen adornos exteriores, de dez milímetros de raio, no que a bordura é de cor azul máis escura e coa inscrición en ouro: «PREMIO A LA CONSTANCIA MILITAR»; ó reverso, en campo de ouro, inscrición gravada en ouro: «F. VII» e bordura de azur.

Acolada ó Escudo unha Cruz de catro brazos de esmalte branco fileteados de ouro, sendo a distancia entre os extremos dos brazos de catorce milímetros. O brazo superior irá sumado de Coroa Real de ouro de quince milímetros. O total da Cruz, con inclusión da argola, será de sesenta milímetros.

A cinta da que se levará pendente no lado esquerdo do peito, será de trinta milímetros de largo, dividida en tres partes iguais en sentido lonxitudinal, sendo a do centro de cor carmesí e as outras dúas brancas con filetes de dous milímetros carmesís, formando augas e a súa lonxitude será tamén de trinta milímetros, sen incluí-lo pasador.

2. A Encomenda será unha Cruz, similar á anteriormente descrita, na que o escudo da Orde é de sete milímetros de raio e ten a bordura en esmalte branco, coa mesma inscrición que a cruz, e rodeando o todo dúas ramas de loureiro de sinople frotadas de gules, unidas polos seus troncos e leadas en punta con lazo de gules.

Levarase pendente do pescozo cunha cinta de trinta milímetros de largo, de lonxitude adecuada para que se coloque sobre o nó da gravata, de análogas cores ás descritas para a cinta da Cruz.

3. A Placa terá o mesmo Escudo que a encomenda, con adornos exteriores excepto a Coroa Real. Irá acolado a unha cruz de ouro con escamas brillantadas da mesma tonalidade nos seus brazos, e entre estes levará cinco raxeiras unidas en prata; cada brazo terá dúas puntas rematadas por pequenos globos de ouro. A distancia entre puntas opostas será de setenta milímetros.

4. A Gran Cruz consistirá nunha placa similar á anteriormente descrita, cargada cunha coroa real no brazo superior da cruz, apoiada sobre as dúas ramas de loureiro, descritas na Encomenda.

Complementarase, así mesmo, cunha banda de seda de dez centímetros de largo, da mesma clase e cores asignadas para a cinta da Cruz, que se levará terciada do ombro dereito ó lado esquerdo, uníndose os seus extremos cun lazo da mesma cinta, do que pendurará a Cruz suxeita con outro lazo da cinta correspondente a esta condecoración.

Artigo 28. *Pasadores.*

O pasador é a representación da condecoración correspondente. Está constituído pola cinta da medalla montada sobre unha armazón metálica de forma e dimensións establecidas nas normas regulamentarias de uniformidade, sendo idéntico para tódalas categorías.

Co obxecto de distinguilas levarán incorporados os seguintes distintivos:

- 1.º Gran Cruz: Coroa Real.
- 2.º Placa: Santo Patrón a cabalo, en ouro.
- 3.º Encomenda: dúas palmas cruzadas, en ouro.

Artigo 29. *Insignias.*

1. Colar do Soberano. Correspóndelle á Súa Maxestade El-Rei.

O colar está composto por doce escudos escuartelados. Primeiro de Castela, segundo de León, terceiro de Aragón, cuarto de Navarra, entado en punta Granada e escusón sobre o todo de Borbón-Anjou, timbrados de Coroa Real, unidos por trece elos rectangulares en campo de azur, «figura en oito» en ouro e bordura de gules.

Na parte central, pendente o Escudo da Orde, sobre cartela de esmalte branco fileteada de ouro, sementada de talos vexetais en ouro formando ondas e volutas. A bordura leva a inscrición en ouro: «PREMIO A LA CONSTANCIA MILITAR», rodeado o conxunto de dúas ramas de loureiro unidas polos seus troncos e leadas en punta

con lazo de gules. O todo timbrado de Coroa Real. Ó reverso, en esmalte branco, inscrición gravada en ouro: «F. VII» e bordura de azur.

2. Colar de Gran Chanceler. Correspóndelle o seu uso durante o desempeño do cargo, ó xeneral do Exército, almirante xeneral ou xeneral do Aire nomeado para este.

O Colar consta de oito escudos da Orde rodeados de dúas ramas de loureiro unidas polos seus troncos e leadas en punta con lazo de gules, nos que a bordura levará a inscrición en ouro: «PREMIO A LA CONSTANCIA MILITAR», unidos por oito elos rectangulares, que levan sobre un campo de azur, unha «figura en oito» de ouro e bordura de gules.

Como peza central leva o emblema interexércitos, todo de ouro e pendente del, o escudo da Orde sobre cartela de esmalte branco fileteada de ouro, sementada de talos vexetais en ouro formando ondas e volutas. A bordura leva a inscrición en ouro: «PREMIO A LA CONSTANCIA MILITAR», rodeado o conxunto de dúas ramas de loureiro unidas polos seus troncos e leadas en punta con lazo de gules. A cartela cargada con coroa real. Ó reverso, en esmalte branco, inscrición gravada en ouro: «F. VII» e bordura de azur.

3. Medallas pectorais. Acreditan os Cabaleiros ou Damas que integran distintos estamentos na Orde. Correspóndelle o seu uso ós membros do Capítulo, da Asemblea e da Comisión Executiva.

Esta medalla consta do Escudo da Orde, sobre cartela, na que a bordura leva a inscrición: «PREMIO A LA CONSTANCIA MILITAR», rodeado o conxunto de dúas ramas de loureiro unidas polos seus troncos e leadas en punta con lazo de gules e o todo timbrado de coroa real, que será de ouro na dos Cabaleiros Capitulares, pendente ó pescozo dun cordón, suxeito por unha argola cun pasador e, sobre este, emblema interexércitos nos seus esmaltes.

A cartela será de ouro sementada de talos vexetais en ouro formando ondas e volutas, a súa bordura será tamén de ouro, para os Cabaleiros Capitulares e de esmalte branco perfilada en ouro para os Cabaleiros membros da Asemblea Permanente e os da Comisión Executiva.

O cordón será de ouro para os membros da Asemblea Permanente, de prata para o resto dos Cabaleiros Capitulares e corinto para os membros da Comisión Executiva.

ANEXO

Nas figuras deste anexo están representados escudos, estandarte, condecoracións, pasadores e insignias da Real e Militar Orde de San Hermenexildo.

**REFERENCIAS "PANTONE" PARA NORMALIZACIÓN
DA COR DOS ESMALTES****PALETA DE COR "PANTONE" MATCHING SYSTEM****CARMESÍ**

PANTONE 225 CV

AZUL MÁIS ESCURO

PANTONE 282 CV

AZUL

PANTONE 300 CV

SINOPLA

PANTONE 335 CV

GULES

PANTONE Red 032 CV

CORINTO

PANTONE 1805 CV

OURO**(AMARELO PARA EFECTOS DE DEBUXADO)****OURO****(ESCAMAS DAS PLACAS)****PRATA****(GRIS PARA EFECTOS DE DEBUXADO)**

ESCUDO DA ORDE




ESCUDO DE SOBERANO



COLAR DE SOBERANO

Colar de 1,020 mm de longo



Reverso




ESCUDO DE GRAN CHANCELER




COLAR DE GRAN CHANCELER


Colar de 1,100 mm de longo



ESTANDARTE




GRAN CRUZ




CRUZ


ANVERSO




REVERSO



ENCOMENDA



PLACA




MEDALLAS PECTORAIS

Cordón de 760 mm de longo

Membros da Asemblea

Cordón Ouro



Cabaleiros Capitulares

Cordón prata



Comisión Executiva

Cordón Corinto



REAL E MILITAR ORDE DE SAN HERMENEXILDO

PASADORES DAS CONDECORACIÓNS QUE REFERENDAN AS DISTINTAS CATEGORÍAS



ORDE DE PASADORES



GRAN CRUZ



PLACA



ENCOMENDA



CRUZ

Medidas segundo normas de uniformidade.